

四庫全書

集部

欽定四庫全書

集部

公是集卷九五至九

侍講學士_臣羅國俊覆勘

武英殿纂修侍講_臣陳嗣龍

欽定四庫全書

公是集卷五

宋 劉敞 撰

五言古詩

題度支廳事許道寧畫松石呈彥猷鄰幾直孺

長松森無依蒼石儼相對自然山林氣若出天壤外許
生筆妙絕今世殊少輩發揮得意表瀟灑與神會炎熱
五月交塵土九衢內微風度牕來左右含天籟下有漁

樵翁生事尤可愛茅茨乍隱見猷畝更向背吾廬若辨
此軒冕本不賴願從二三子相與駕言邁

擬阮步兵一夕復一晨

一昏復一晨一晨復一夕擾擾若有為悠悠定何役譬
如風中葉不自知所適譬如池中魚強自營所得朝乘
日車出暮與羈鳥息昔我髮純漆今我髮半白誰能邀
神靈傳我雲表翼我與從之遊覽觀元化極

紀危

四月河水湍怒風復相乘維絕枕亦推舟人廢其能中
流急迴環頃刻不可勝性命委自然豈知所依憑堤旁
多聚觀失色氣崩騰孰不願引手而乏鉤與繩嗟我亦
天幸既危乃復興追思方厄時汗出如洗冰側聞前此
者覆溺已屢曾此事通為邦長民可以懲因書作長詩
俾不忘戰兢

十二月十一日雷電有作

今茲方隆冬陽春尚宜少

去聲幼
少之少

何忽雷早聞因之電

爭曜碑轟非常怒礪碑通夕照號令無乃乖災祥諒誰
台吾聞玉女戲獨得天公笑此理正應爾君毋強譏誚

種紫蘇

赤日厚地裂百草殆立枯朝雨應所至雖微念勝無力
難興禾黍可以成嘉蔬歲暮有此望帶經且親鋤今茲
五月交盛陽消已徂汲汲愧老圃仲尼云不如養生寄
空瓢雖乏未可虛正以營一飲形骸如此劬

遣懷三首

天道與性命聖人罕其言七十豈常士游夏終不聞鞠
躬慕仁義或不免饑寒奸雄何為者往往為世賢倘復
有真宰無用預其間

有形每共生達士獨無惑昔有蒙袂子恥從嗟來食物
生會當盡壽非金與石但恨居世俗不能盡胸臆壯士
志滿壑斯言著前識

初歲志慮淺所慕在輕肥自恨聞道晚不虞失性非迷
途將未遠回駕有庶幾古賢多事業出處何不知寧受

芻豢辱倘為鴻鵠飛

歸牧相訪示所作詩賦篇予與其兄子緯還往頗

熟

曰予謝賓客久與時世疎何忽衡門下見枉使君車形
旆映落日腰間有懸魚抵掌若平生論文及空虛昔與
君猶子結交幸通書往還苦不早相見情有餘置我二
阮間遠慙德不如強來束帶起投謁尋君廬

大雨中入局寄彥猷時以疾臥家

歌蒸變繁陰快雨如破谷明趨閭闔路深水入馬腹此
地常結轍江海忽在目冥行畏坎井躡迹戒顛覆慙問
高眠翁不知泥塗辱

賀龍圖兼知延安

大兵昔摧傷兩將折旗鼓哀哉中國士化作城下土冤
魂不得返殺氣凌彼蒼天亦為之悲白晝日無光人言
此城下往往鬼神哭此事天子憂此心大夫辱昔公守
東越人怨公不用今日公在西知公德持重築城不必

堅解甲不可攻何況保金城弛張皆繫公汲黯輔炎漢
淮南內竦懼郅都守窮邊匈奴為之去此事昔所聞今
日見所親折衝樽俎間震動旃裘民國恥行且刷寇讎
不可保斯人嘆微管願及太平老

奉和宋次道遊嵩十五韻

嵩峯三十六皆在青雲端宿昔望見之恨不生羽翰卷
轡塵土中日月如波瀾過來老將至更覺行路難聞君
謝車徒選勝羣峯巒幽深每獨往神異多所觀若有真

仙子羽衣白玉顏吹笙煙霧中舉手留盤桓信非人間
境邈與時俗懸顧懷平生舊慰以逍遙篇三復想在目
令人愧衣冠處世濶且疎幼與亦有言一丘與一壑自
謂無間然安得從君游解纓弄雲泉昏昏歲復晏相望
空長歎

和聖俞逢羊

道旁逢羣羊問羊將何之朝供大官膳躑躅未自知
轍此何罪無乃芻豢為肥軀一報德鼎俎安可辭寧辱

金野史卷五
泥塗中故人所以悲

懷歸

圖養始干祿，執官復辭親。外物與我違，幽懷安得伸。低徊畏簡書，苟且謀賤貧。碌碌已無期，規規徒自珍。秋風卷層雲，鴻雁知所賓。我獨無羽翰，不能絕臆塵。

送呂光祿

自十一月留郡下
凡十餘日得劉字

汜濫誠易挹，俊賢嗟肯留。愧君殊邂逅，卒歲能優游。會心到稽呂，訪古窮嬴劉。誰令春風來，翩翩動歸舟。千里

在明發一樽成獻酬江湖望魏闕離思空悠悠

題改芷亭作水鑑亭

昔人種白芷既以名此亭今我開蠶淵復以水鑑名吾
豈異昔人而徒易其稱所樂於水乎內明而外清內明
可比心外清可照形照形不吾欺比心不吾傾虛靜吾
自居逍遙以無營會有水鑑賢吾能與同登

閉門二首

閉門無所事歲月忽已極豈敢空絕交出門諒安適是

非歛外慮文字堆四壁堯舜參在前孔孟凜居側崑崙
默泛覽萬里在瞬息負古時幽尋千年僅頃刻悠悠富
貴士此趣猶未得胡為逐車馬辛苦牽事役

傅巖由帝賚圯橋自神授商道繁復興漢基翕然構窮
通苟有命貧賤豈足疚斯道誰得聞人方薄圭竇

小孤山

驚波觸南崖反怒射北壁蒼山相與排所謂小孤石蟠
根萬仞淵聳角百丈碧祠堂豁精巖行旅進粉澤或云

婦女神胛蠻頗有迹吾知定名意似欲旌介特流俗失
其真傳聞莫開釋居人私其利禍福妄損益競為媚妒
說以誣聰明德先王秩山川禮典有廟食奈何媚於竈
屈已忘正直吾欲為小孤作書解行客復恐不見從嗟
哉世多惑

新種雜花樹

天地大逆旅浮生遠行客大無萬里異遠不百年役乘
流惟其遇得性從所適何必思舊鄉而復名一宅此邦

非吾土此廬非我迹彼我苟已齊賓主不足擇終樹宿
所好及閑易為力芳草十餘品往往手自植春風二月
交重疊庭下碧欣欣生意好一一見顏色對之默終日
澹若無情極四時背人馳壯士每歎息憂來忽無方外
物不可釋中和一相伐頭髮先為白萱乎爾能忘於我
獨有德

滕司諫知涇州

天狼東南鳴雨矢西北集履載豈不容縛虎宜在急詩

書擢將帥高枕付城邑權變非武臣恩威在呼吸壯夫
氣已激義士感成泣籍籍名四喧蕭蕭髮競立行旂亂
鷹集已有邊風入遙知謁明光今宵但長揖

城下

秋成雨更綠高下共萋萋浮烟晚自起歸鳥暝爭棲山
谷入幽想茅茨多舊蹊日涉遂成趣身將麋鹿齊

庶幾堂

徂暑亦已煩清旦尚餘爽薰風應候至芳物與春往庭

樹交浮陰山禽轉清響空堂更幽寂初日正蒼莽時節
無所感忘言以為賞

涼夜

疎雨洗明月清風生晚涼動搖星辰影汎澹河漢光螢
變覺草腐蟲吟知境荒端憂易遠感不眠疑夜長

秋梁公李太尉廟

就列貴陳力立功尚成名兩君雖異時令望相提衡治
獄多陰德不戰屈人兵去思獨至今奉祀見遺氓文武

百世師將相一時榮念我誰與歸愴然悲九京

畢吏部冢

在太一宮側

蓬蒿道旁冢云是晉時賢名聲與陵谷共盡一千年惟昔縱達觀死生同蛻蟬安知泉下魄非復甕間眠

和張洞春雪

水國雖暑濕亦惡春令早雨暘恒不時過燠未為好凌威集驕陽瘴疹一以埽宿麥根復濡豐年不煩禱堪興氣清真生物同壽考大哉造化力排幹正穹昊能令四

時順少失安足道君胡乃嗟嘆哀彼花與草方今王正
始節物自未老繁華雖云遲秀實終自保可以寬君憂
母為色枯槁

雪意

淒風起幽朔白日晦光色仰視浮雲高蒼茫天容碧林
林悞羣木栗栗抱寒魄今朝識天意欲見松與柏

雪後

日出桑柘巔鶴鳴風景和縱心適田野顧覺春意多欣

欣林間吏負薪行且歌此中有真樂富貴如余何

壽寧觀殘雪

春陽漏潛筦凜氣留深殿金莖向飛露碧瓦仍鋪練寒
光寂寞迴暖色依微變壺中異風景會待花如霰

初雪

荒居人迹絕但覺歲月頽北風不我欺吹雪天上來入
戶時繽紛當軒肆徘徊有情知相親高臥未足哀他日
門晝闔今旦門早開開門將誰為南山玉崔嵬

雪中寄貢弟

天寒雲長浮雪急風更厲行子歸何時遠遊感人思眷
令顧傳下鴻雁順時逝原隰無安居稻梁無深志誰令
歲月晚坐使羽毛瘁江湖可遣憂引領正相遲

月夜

日入更洒埽脩然庭檻空酒杯落明月白羽來清風佳
興自不淺幽人無異同徘徊卧林下重露霑蘭叢

和閻都官九月十三日夜對月是夕某與子華聖

俞如晦會飲君謨所

秋霖恣淫溢后土無時乾忽驚浮雲盡更覺天宇寬涼
月如白壁飛來青冥端衆星稍滅沒驚鵲自盤桓興發
思遠遊惜無凌風翰聊尋故人家呼酒澆肺肝適與二
三子四座俱解鞍意合心同賞百觴不辭難玩古驗漢
魏君謨出漢魏時金錯銅機精麗有分寸尺度天下奇物也舞妹試邯鄲詆諧雜謔

語大笑傾衣冠足為一時樂未悟清夜闌每至絕倒處
恨君不獲觀明發得新詩照人瑩琅玕又知共茲翫正

若相從歡君本青雲人淹留尚郎官曠懷不自屑過景
宴且般古來悲秋士局促宋與潘相望如轅駒豈足為
君歎

夜月

執熱不可濯昏昏倦衣巾涼月如有情萬里來慰人浮
雲卷層虛六合隨清新河漢涵光輝城郭息埃塵茲時
一可畏與子聊相親逍遙夜未央更益情性真

夜起呼徐監簿同看月

夜長愁無端歲晚易多感徘徊中庭步相與肆遐覽繁
霜冷次骨皎月清照膽幽意暫欲飛秀色若可攬明夕
雖復來素華已應減念茲徑使醉無使我心慘

南伐詩

兵行何忽忽百里不一息南征有期會相觀各努力三
年戍西荒蟣虱生金革歸來席未暖羽檄何奔迫行行
當逾嶺五月逼炎赫尚有筋骨存所虞生死隔山林如
煖焚溪水沸湍激自古皆有言一夫萬人敵蝮蛇長相

逐虎豹不可格主將貪功名謀臣貴恩澤奈何輕人命
棄置曾不惜探湯入其中未半死已積蒼生亦齊民不
必皆盜賊賢主尚扇暍仲春猶掩骼一身不自愛所懼
失為國堯舜有舊書廟堂為法則

城樓送別

驚風走枯蓬百里不暫息密雲乘飛雨前山坐成陽蓬
老初無根豈辭遠為客山高雖可望路遠當不識去留
類如此覽物意寧極鞍馬未動間會合彌可惜緩歌送

清觴更醉日將夕

李縣州訪別

天寒起常晏日出扉未啟深巷聞傳呼
兒童怪旌榮知是漢中守訪舊來至此
適我平生懷趨迎願少止結交許忘年
並坐每抗禮語罷當遠行眷然色不喜
君惟二千石我徒一男子貧賤宜輕肥
反如不能已善化遲暮月壯心隘萬里
側聞報政速永觀凌風起寧復悲東山
滔滔歷年祀

食橘

吾聞江陵橘乃比千戶侯歲獻天子旁取為廟堂羞問
其何能爾無脛而遠遊橘也不自言請君以臆酬憑生
覆載中頗亦萬木儔通為騷人頌謬得禹貢收託身聖
賢間自覺名譽浮苞苴賴携挈富貴常見求明珠無先
容按劍或暗投而我適衆口鑠金不予憂物生有通塞
不必在中州何用懷苦辛但為時所仇

留鄰幾君章奕棊便宿小齋

簿書易短景燈火宜清夜過從喜吾子尊酒追我暇歡
來中局豁興盡外物借錯落盤上棊白黑互陵跨決機
競神速取勝頗雄霸惜我壯士氣局此萬里駕時乎無
由試寓目亦悲吒天地一枰土古今萬物化願無辨其
間痛飲但來舍

與鄰幾對棊戲作

碌碌無用智玩此方罫間君乘百戰餘勝氣不可攀拙
速亦天幸出奇犯險艱數倖効軍實斥境除邊關捧觴

跪進養座客歡解顏安得百壺酒使君酩酊還

公是集卷五

欽定四庫全書

公是集卷六

宋 劉敞 撰

五言古詩

今古路

出門道路多縱橫不可測我今欲遠行須問曾行客徐
徐逢路人借問青松側客曰今何往答之遊京國客乃
指要路而言行有益古路雖大道不如今路直但行今

人路猶如假羽翼彼客別我去獨自躊躇立為見今古
路信乃無差忒今路足輪蹄古路多荆棘欲行今人路
恐背古人迹欲行古人路今人笑迂僻又擬不出門奈
何飢寒逼哀哀此時路悠悠蒼天色不避今人嫌路須
行古陌古陌雖然遠且保無蹶失勉哉自勉哉前去難
云適不獲見楊朱萬古凝愁魄

曉至池上

宿雨墜高葉薄雲麗朝陽園林澹澹秋庭戶蕭蕭涼水

淺魚怫鬱荷深鷺低昂幽懷欣自得住賞契所望忽恐
羣動作深林沸蜩蟬

晚涼

落日蔽崑崙微風起闐闐蟲聲語悽惻樹影翻離合蚤
露結明珠圓蟾瑩塵匣浩歌始自放喟此區中狹

金山東崖北望海門

憑高仍一望北固何崔嵬地形東吳越江陰通邛崃英
雄既已矣壯觀空在哉寂寥寒潮上孤帆當檻來

屏上兩賢二首

謝公樂山水不以官爵間天機有所賦世俗從爾訕上
躡峻巖峯下弄清冷澗吾生慕如此敢避刺疎慢寧為
途中龜勿作蒿下鷄

謝靈運

人在誰不如妄為世所束興來當自往興盡期自復大
雪暗溪路新晴月微燭去非之子慕迺豈斯人辱優游
便所適偃蹇媚幽獨

王子猷

贈梅聖俞

耳聞梅聖俞及此將十載洛下聚英豪文章富如海聖俞

昔與錢丞相歐陽公尹聲名動冠劍久合參朝案何意洙王復會洛中皆名士

幕中客新違江上宰

聖俞以諸侯從事知建德縣罷歸京師

材高雖用晚

大器終有在三公識者多薦拔可立待棲棲九衢裡塵
土增厭殆相逢恨知晚乍似去貧餒鄰居幸見過沃此
冒礪硯

登禪智寺上方贈同遊諸公

重岡抱城起清川帶野回舊都遷陵谷遺寺空池臺脩

竹入庵 靄荒溪轉 雀鬼鳴禽畏人起 故老驚客來置酒
感興廢 浩歌寄歡哀 伊昔游此人 于今安在哉 谷深春
先覺地 爽景後顏造 適假一笑頷 君盡餘盃

楊白花

飛飛楊白花 隨風渡江水 江水來不極 楊花去無已 鴉
啼淺深樹 雪落千萬里 春風傷人心 緜緜復如此

涵虛閣玩玄猿孔雀

清池明夕景 高樹含涼風 巴猿戲前檻 越鳥安深籠 悲

吟激清漲文繡揮蒙茸弱喪不自非全生或為容曠然
感真樂達哉濠梁翁

雨霽同望民登西北樓

雨餘暑氣滅日出浮雲開高樓極遠目百里無纖埃山
形西北驚江勢東南來舊都尚能記壯觀多可哀微風
激清嘯浩霧侵寒杯亦知非吾土聊復樂徘徊

秋興三首

微風起閭闔秋意日已滋陰蟲羣悲鳴草木同變衰天

道雖茫昧平分為四時功名自當去搖落獨何悲

魏牟貴公子沉沒功名間一浮江湖水慘戚顏朱顏魯
連揖萬乘蹈海如忘還棄世脫敝屣風流安可攀

耿耿河漢輝中夜西南流牛女永相望婉孌悲素秋安
知乘槎翁徑出海外遊天路或幽險神仙非所求

留城子房廟

大風起豐沛海水羣飛揚逐鹿未有歸飛熊猶道旁一
見契千載立談開八荒蛟龍不可羈鴻鵠得新翔昔為

黃石師智策無與雙晚蹈赤松賞功名忽如忘由來神仙流理與天地長陵谷自有遷若人豈復亡我行覽遺蹟城邑空蒼蒼感古追遠遊白雲杳無鄉

同介甫和聖俞贈狄梁公裔孫

陳平智有餘周勃勇無敵兩人相提衡終復漢社稷梁公柱石姿獨立謝羣力匡居多直言薦士有深畫既扶將頽運復起未然策事業兼二子浩然雪霜白偏材戒獨往特達見令德誰謂十世遠風義猶不隔末孫何支

離猷畝有餓色明詔問樂鄉布衣列士籍名垂天壤間
氣使懦夫激聞君商聲歌更若出金石

贈聖從待制

君居御街西我居御街東如何百步間十日不相從君
非園中植落落千丈松我亦湖海人庶幾孤飛鴻俱遊
人世間俛仰豈不同蕭蕭髮向白哀哀嗟轉蓬仕固不
期達貧亦不諱窮行當一麾去幸識櫻寧翁

早至涼榭觀芙蕖

林深池亦淺日出光晚及粲粲花尚含漙漙露猶浥良
魚潛復躍幽鳥翔又集物情恍如慕心賞浩難戢誰能
贈遠人采采空佇立

同客飲涪州薛使君佚老亭

百尺井底泉激輪乍飛流潺湲入庭戶宛轉如奔虬主
人三署郎持節西南州棄之臥故里富貴安足留卻埽
長閑門羸餘非所求官來坐林下樽酒相獻酬未嘗語
朝市餘事良悠悠乃知獨往意不必山林幽衣冠多雋

才繼踵公與侯誰能懸其車五十未白頭嗟嗟賢大夫
此風可鎮浮為問三輔間何如馬少遊

曲水臺竹間默坐

杖履不能遠逍遙池上林微風起衆響炎日隔繁陰斐
疊激流泉間闕語鳴禽放懷在離人寄賞欣會心既謝
朝市喧亦忘山谷深雖知非吾室猶以開煩襟

永興軍中

涼風響高樹清露墜明河誰復夏夜短已覺秋氣多豔

膚麗華燭皓齒揚清歌臨觴不作意奈此粲者何

北軒手種竹兩竿近輒有甘露降其上作五言示

諸同舍

秋來手種竹憔悴不成林復此雪霜晚空驚孤直心如
何沾瑞露似欲慰窮陰珠華粲將墜玉色潤還深含春
乍荏苒載日尚蕭森玄澤非人力樵蘇無見侵

舅氏見索新詩

賤子本不學大賢宜見疎奈何手賜教反謂詩起予高

義終炯然內慙良闕如得非魯仲尼不廢狂接輿羈旅
習荆楚荒唐存簡書敢驚和者稀長恐歲已徂雲漢回
天章圖書祕石渠瓊瑤落咳唾寒暑隨吹噓百年渭陽
悲萬古秦風餘嗟我送舅氏終焉非路車

贈蘇頌

犬豕蒙虎草氣能懾羣雌衆人見之美蘇生見之嗤褐
客懷寶玉精神暗塵縑他人望而唾蘇生望而知知之
竟何補位下容貌卑雷同世方尚獨異誠難施嗟子豈

不謬拳拳心不移拜我呼我兄問我謂我師
奔蜂負藿蠋誰道當其宜憫子空慕古且為世人非
古人亦如此如此名已垂但當勵行習慰我千里思

雪後城上作

雪後原野曠春生風氣和藹藹林表色輝輝
池上波形閒境逾靜望遠意更多年華適可玩
不醉將謂何

寄因甫

君雖委計吏官似宣尼公貧賤更何恨優游聊與同志

金匱要略卷六
懷鴟夷酒乘興松江風此亦隱柱下何用臥隆中

寄聖俞

徘徊帝城裏獨詠有所思故人昔別此秋風今古茲流水去不已新鴈來有期寄聲可相及一見慰天涯

秋雨

天道去人遠好惡常若違始耕苦炎旱既獲雨過時憔悴兩無補飢寒方自茲素飽猶可恃眷言采其薇

寄密令楊彥文再舉學官皆中正

三年不相見相見當何時
曩別不謂久後期庸可知
周南滯留地宿昔太史悲
春草愁山中王孫髮垂絲
懷寶常若迷獻玉常若疑
聞君已屢薦終歲獨差池
得鹿在詭遇亡羊實多岐
著書成自樂回首空相思

贈黃子溫別

雙鴻俱異鄉來集清川流
鳴聲偶邂逅形影共沉浮
一以風波去一以罟網留
去留雖殊趣失侶自懷愁
五里一斂翼十里一回頭
有情同覆載誰免顧朋儔
南國江

金
卷六
海闊豐年稻梁優力弱霜霰繁無因攜汝遊

同謝十三賦盆池

碧沼含白水動搖明鏡光浮沉見魚樂舒卷聞荷香賞
翫茲有適紛囂因以忘多君江湖意不復疑坳堂

庭前箭竹

冉冉東南美託根那在茲鳳凰不可待歲月方屢移非
復山林意空餘霜霰姿清風有時至獨與幽人期

新置盆池種蓮荷菖蒲養小魚數十頭終日玩之

甚可愛偶作五言詩

采芳未盈手積潤不滿尋游魚亦何樂幽客同此心安
排在所寓相與忘浮沉濟理趣自足孰知慕高深鵬翻
蕩滄海龍起焚山林體妨反多累豈若終蹄涔

送鬱林楊守

鴻鵠懷遠心不畏霜露寒鷄鶩守樊籠朝遊暮來還人
生感意氣朋友死一言況分社稷憂復在君臣間楊侯
一麾守萬里蒼梧山瘴海不可游衆人昔云難升車獨

慷慨卽路無險艱乃知抱忠信可以居夷蠻昔賢尚功名天子憂南蕃報國恩汲汲勿令歲月遷

送春

莫埤林下花花存春尚在一隨南風散飄忽不可待四時相乘凌萬物隨變改不如玩三秀忘年蹈雲海

答舅氏時詔不就學官者郡勿舉故見督赴期

飛鳥知深林潛魚樂淵濬升沉久相笑出處各自殉漆雕不願仕孟子恥獨進軒冕世所榮吾斯未能信辟雍

煥文章王國聚英俊及門足自喜內省媿多吝且將事
猷畝亦以樂堯舜悠悠謝知音當識斯言詎

送張宗道崇班自潁徙秦不樂于行

宛馬來東道燕鴻起南飛適時必有過去遠不獨迷左
攬繁弱絃右拂青萍輝笑作千里別出門亦依依人生
何新故行道情有違勉率歌清風以慰君永懷

陳元龍

元龍湖海士固有湖海氣自臥百尺樓羣兒仆諸地大

賢資遠到高節邁一世四野為戶庭九河乃衣帶靈機
有時屈英識豈獨閉蛟龍隨波游恥與魚鼈計擊劒歌
商聲捐書謝俗議功名留當年異代見君意

一月贈深甫

一月三過公此非兒女情詩人感伐木相鳥猶嚶鳴尚
友百世近結交千里輕矧惟生並時况復居同城攜手
未宜少興發從公行開口露肝膽解衿頓塵纓心親愛
自至外物都忘形赤日留中天火雲正崢嶸頗復哀老

子安眠枕羣經

懷歸

往昔佩觿日童蒙幸相求中間萬里別倏忽二十秋入
事固契濶歲華易如流聞君尚黃綬失意成白頭奄速
不可期升沉亦難謀寧知及門晚忽辱從政優感舊勞
心腸相逢恨淹留寄聲不盡意何以紓離憂

同寄題康州陳生連理木

幽人古素履佳瑞應精誠蕭蕭衡門下珍木為之榮連

理出高榦交陰庇前庭顧恐俗未知天方表其閎太邛
往千歲慈孝復騰聲誰言報施遠有若晝夜明世悲上
留田吾慕董生行作詩寄南州且以慰父兄

雪後

雪銷吐膏潤日出春意歸鵲鵲多時趣融融含夕暉徘
徊終林下髣髴田野期天歡頗不減吏隱亦庶幾歲宴
竟何事濁酒但當揮

和彥文秋興

商飈零枯林疎雨墮中夕覽物愴已驚懷人渺難得明
發聆逸唱願言慰幽寂胡為抱紆鬱更使動悽惻蜚鴻
識來賓鷹隼知所擊物微有逢辰子壯獨失職高天終
難問淺俗每忌直浮沉豈非智器遠固難識

贈周生

駢驥能千里不能走鼠穴猛虎拘穽中不如狗善齧周
生學干祿強進屢顛蹶時不用周生周生亦不屑行年
過五十頗就知命說未嘗畜妻子名利敢貪竊所憂道

未能欲辨孔與桀人知如此鮮況不厭藜藿與我始相
見便覺抱高節人皆用其巧子獨趨所拙春秋舉逸民
蔽善尚貶絕誰期大夫賢薦使在班列

嘯亭納涼

翻翻竹梢葉習習蘋末風水氣稍澄澈雲陰反蒙籠解
襟面虛曠幽興欲飛冲得意恥獨善慨然環堵中

過澶州陽橋有感

河水東赴海還從天上回寧知今日波還復前時來岸

柳亦已萋原田正萋萋念我平生歡悵然使心哀

春晚小園

歲華一何速春物俱已老綠柳低映牆
半蘭生滿道郊居止幽曠野色慰懷抱
入鳥不亂羣閉門但卻埽平生佯狂性
更覺高臥好不及古之人吾誰玩芳草

公是集卷六

欽定四庫全書

公是集卷七

宋 劉敞 撰

五言古詩

停雲詩

停停何山雲
靄靄在我廬
濃光賁草木
潤氣下琴書
望望若可親
久之翳寒虛
坐恐焱風來
東西隨所如
我道與世異
里閭相見疎
嗟雲亦何事
低徊能慕予
諒以無

心故形影暫相於

華山隱者圖

神仙不可學淺俗如醯雞逍遙二三叟乃獨秦遺黎避
地思遠適名山得幽棲深巖紫芝秀歸路桃花迷稍遠
人世隔遂忘陵谷移至今山中人往往猶見之吾聞秦
皇帝甚慕真人為駕石窺蓬萊載車象雲蜺沙丘往不
返四海忽若遺安知全真子近在西山垂一千二百年
修身未嘗衰古稱山澤臞非復萬乘期觀君此圖意有

以和天倪

送上元張孟侯著作

避世金馬門歌直承明廬月贏一囊粟調笑騶侏儒忽
憶東南行秋風熟鱸魚聞君已先我扁舟向江湖銅章
垂腰間賜履雙飛鳧千室豈不憂弦歌自為娛古稱有
人民無事專讀書自顧都城游刺促轅間駒六朝若流
川覽古半有無山中折瑤華千里懷離居

小隱吟

世道喪純粹微名掠其美悲哉山林客過半朝市死夸
誕一相習澆浮益紛起古風日飄泊末路空顛靡堯舜
安得逢巢由亦已矣我歌竟誰和惆悵同心子

招隱

鱸鱖不容池鴻鵠常畏網全真貴遠到先覺每獨往綺
皓遺泰憂季鷹樂吳壤知幾効來世前識妙難賞勿謂
鳥獸羣高山適予仰

反招隱

伊尹樂堯舜伯夷傲姬周顏生一簞瓢陋巷亦自休豈
不困寂寞時俗非所謀脫身洒泥滓緬與前人游嗟哉
波上鳬徒為信沈浮鴻鵠假長風不能占渠溝蹄羽扶
桑阿刷翼滄海流世途既超邈矰繳何足愁所以狂接
輿肆歌悟東丘觸時懷慷慨視世悲蜉蝣哲人有先覺
達者無近憂綺皓吾所師緒言起長謳

郡齋燕居寄海陵道粹儀真景休高郵不疑三太
守學士

尚容恥玩世畏景希就陰一麾諧微願千里非遐心平
生志江海寤寐在山林及此吏如隱始知古猶今鷓鴣
避落實蛭蠃安蹄涔但恐得已多尚非力可任諸公蓬
萊秀夙昔交契深擊柝聲相聞照鄰光四臨清濁涇以
渭離合商與參願言三秋思毋闕金玉音

新作涼軒會張拱辰至

張翁垂白鬚扶病過我廬向無俗客至適慰幽人居酌
此瓢中泉振茲架上書雖無德與汝會有歌起予欲識

消長情願君講盈虛

發桑乾河

四牡懷靡及侵旦肅征駢凝霜被野草四顧人迹稀
冰流日邊去鴈向江南飛我行亦已久羸馬聲正悲
覽物歲華逝撫事壯心違豈伊越鄉感乃復淚沾衣

寄呂侍郎

呂先予數日北行

荒山逢故轍自上重岡立君車不可望君手何由執
旅思隨日遠徂年背人急舞劍中夜興應知憂感集

廣陵蔣生死十四年矣尸猶溫其妻與其女閉門
守之未嘗與鄰里通水火或者疑其有道而杜君
懿實之蓋嘗有自遠來者以書一封畀其家視之
蔣生迹也故俗以為仙因作五言贈君懿

仙翁棄妻子往為壺中客玉棺竟未掩人世已成昔白
雲無回期三徑滅餘迹猶傳有青鳥往往寄消息

新年

流光無停期二十忽復五古昔如我人功烈難遽數上

天終無私日月不少駐三皇與五帝回首焉得顧新年
獨何為擾擾趁俗務壯羞兒女態浩歎覺已屢巍巍九
重闕象魏懸法度木鐸非仲尼布衣欲何預滄溟百萬
里乘桴意決去顧世聊徘徊非為取材誤子曰無所取材東風
發幽滯花彩映草樹爛醉苟自娛終焉背時譽

築室種樹

誅茅作吾廬種樹滿百株偃仰可卒歲優游問誰如墨
翟不暖席仲尼無安居良知聖賢貴逝與功名疎清泉

可深鑿惡草須早除適意田野間誰能數歸歟

題所種金鳳花自淮北攜子種之云

愛此名字佳攜之不憚遠豈惟江淮闊兼恐歲月晚手
植中庭地分破紫蘭畹綠葉紛映階紅芳爛盈眼輝輝
丹穴禽矯矯翅翎展卑飛何在此寂寞難自顯按圖感
形似覽物意繾綣三復接輿歌悲風動湘沔

得隱直書并聞將之洛陽

三月一得書始知去君遠開緘見無恙豁達百慮展秋

風催時節搖落歲向晚遲遲行旅外色瘁足更跼邊封
鳴狐狸牙爪貴鷹犬儒者非所須棄置自未免上書報
聞罷試吏何繾綣雖無小官羞頗貴有道卷洛陽雄王
都主簿亦極選折腰得免否局促時態淺

閱武堂

涼風卻炎暑飛雨除氛埃旅行得與會珍館為我開主
人平生舊上客自遠來何異東序賢共此中山杯留連
恨落日披寫仍高臺山川愴興廢歌舞寄歡哀徐方多

賢牧天祿繼英才遊子悲故鄉為君更徘徊

寄張十二時在城北讀書簡云幾至絕糧

新秋意無聊多病時畏晚出門塵埃隔扶杖行步蹇雖
開一城居邈有千里遠風雨思雞鳴幽懷固繾綣食貧
非余病學道與時反悲歌空相望不復能裹飯

因甫移宰晉陵

自我游毗陵五年今于茲未嘗不閑雨未嘗不苦饑成
湯周宣世豈復能過斯上無桑林禱下無雲漢詩赤子

餓溝渠良田生蒺藜聽于閭里間愁毒不可為思得一
賢人救其渴與飢上天似悔禍子乃今來尸愛民在藜
儉自可為吏師但恐百里小膏澤難盡施子本湘鄉君
湘人望子來下難兄弟別上顧墳墓違將母以諗君上
書再三辭朝廷欣然許多士咸謂宜為政推此心可令
考者慈吾聞屠牛刀不貴于割雞思君苦道遠莞爾寄
此詞

同彥文送敦儒宰晉陵

朝廷責儒術子以文學顯郡國重民社子由政事選榮
名信難兼衆望固不淺古人定何如壯志獨能勉由來
跬步並必有千里遠去去聆絃歌吾當謝言偃

九日

霜薄氣早寒木落景已變佳晨事厭勝習俗推往彥憂
來初無方興盡復自遣所遇無故物登臨殊非願

寓言

感豫常出異禦寇哀壺丘好大固累已巢父笑許由東

海有意急飛飛何所求縱軀天地間細故紛紛悠悠願言不死鄉可與賢達游

晚景

結廬玩蓬藿反畏人足聞杖藜有時去入獸不亂羣踈雨洗徂暑夕陽澹微曛俛仰多物態逍遙遣塵紛興適將何述寄心孤飛雲

野人致枸杞青蒿

味薄時共笑野人猶相高春田有餘暇饋我杞與蒿酌

酒謝其意採之亦誠勞城中多好事過半稱賢豪杯肴具五鼎珠玉輕一毫將之獻門下皆有千金裘何故背此計而反從吾曹淡泊徒自樂膏薌未能叨信知老農美頗欲耕東臯因閒有餘力從爾觀芟薌

春暮到小園

春餘百芳歇喬木有輕陰客子成春服商絃應鳴琴獨行迓世俗長往期山林庭竹風正駛池波雨已深臨流窺躍魚倚杖聆遷禽順時寄俯仰適興契飛沈試謝及

門客未慙招隱吟

送雅禪師若神

太湖三萬頃澄澈浮寒穹明月不可取孤帆安所窮俯

弔滄浪人

禪師若神與蘇子美遊于美自作滄浪亭

緬懷鴟夷翁古今共灰

滅得失如夢中詩興觸物遠禪心隨念空猶多碧雲句

寄信東南風

蒼筤源

日出江氣暖步行村落間偶逢蒼筤息若在山中閒綠

金定四庫全書
卷七
條既蒙密清波自回環初疑人迹絕久有笑語誼脫足
涉澗水隔林叩柴關主人疎世事相見亦歡然稍覺耳
目曠久之遂忘還歸來說舟子適過武陵源

樂郊陳漁臺下柏林中結茅作小亭命曰幽素本
懿臣刑部之書也謝且戲之

結茅更何好列柏自成林素履宜獨往幽人欣宿心炎
輝翳羽蓋清吹和瑤琴稍與事物遠忽如丘壑深良無
山水趣安得契知音

種蔬二首

時雨破膏壤荷鋤回城陰
疾耕意不足覆隴力可任
里巷多父兄往來迹相尋
見我山野服欣然用盍簪
勸我勿減裂哀我識浮沈
雖微生平故頗用愧其心
採芝商於嶺食薇首陽岑
念我非其人豈敢慕山林
聊以資素飽身世實崎嶇
丈人不我厭荷蓀時見臨

種蔬南岡下地薄旱亦久
抱甕出復入拮据病兩手
輟耕起長歎四海萬億畝
過亢今若茲我誰與餬口
縣官

祈雨澤四望已並走巫女歌且舞土龍矯其首上天何
寥寥百請未一偶霖雨待爾輩古人亦可醜咄嗟雲漢
詩萬古竟何有天地何不仁百姓為芻狗

重陽

勞生惜流陰徂歲逼窮律燥燥黃菊花離離紫茱實芳
香不可再採掇自有術零落勢足悲盛時亦未失登高
散百慮驅馬恣所出或云避陽九可以納元吉嘉願誰
間然且當醉終日

浚井

鑿井勿憚深汲繩欲令長鑿深源不竭汲遠氣自涼豈
如潢汙水汨汨道路旁雖復不遠求飲之劇燂湯虛煩
生四支渙忍不自強野語合為國願君著巖廊

古寺

唐殿弛棟梁空庭長荆棘坳堂客水腥壞碣苔蘚積經
營東晉始遠近千歲逼興廢紛可悲徘徊意不憚尚餘
土木巧未露斤斧迹使鬼固已勞斯民忍終役悠悠競

頽波擾擾非一國臺城更荒唐萬古共悽惻

書候潮亭

滄江浸長空天使限南北繁陰屬暮歲波浪無時息烈
風何轟颶深木騰霹靂遠吹湖中白來蔽江南碧巉巖
千峯玉變化不可測恐是時向晚鬼神任胸臆燭龍銜
長耀來集崑嶺側又疑吳王兵如荼壓上國勇氣吞中
原晶光洞江北久望生悸慄嗟我問津客橫流豈難制
路險未可得吾道固當然滔滔欲誰易

徐安撫

伏波喜功名南伐終不返死餘蕙改謗生恨鷓鴣鳥晚干
戈非一方智勇易謀顯富貴誰不然枯榮子何反冥冥
炎州隔杳杳天道遠荆楚猶古風招魂動哀挽從人除
憂謗不得志者罕

石首縣

叢石浮水中峻隄缺復連往往為深潭波流自回環秋
山未搖落碧樹皆參天仰觀積水痕仍在高樹巔里人

半巢居出入隨烏鳶令尹亦菜色市樓寂無烟皇天不
純命百姓何震愆苦云耕織廢租稅尚未蠲赤子向漂
蕩所存皆偶然雖知負官輸未忍更棄捐奈何唐堯世
復見昏墊年何以救汝飢朝廷急憂邊

召諸弟博飲

今日寒頗甚淮南似京土江風既落木山雪亦帶雨幽
居自無聊病卧亦寡侶壯心顧牢落出門孔多阻古人
戲臯廬志氣本尚武勝來在快意百萬不足數恨無酒

如澠杯盂空屢舉開顏強隱几豈必歎貧窶

別和弟

暫會復遠別惆悵終無極人生非神仙豈有頭不白維
舟相邀宿淮水風浪黑輾轉不復眠四聽人盡息丈夫
非懷安少壯宜努力況子行多歡自怪情不懌誰言冬
宵永達旦才頃刻雞鳴日光出握手各南北仰謝雲中
鴈羣飛接羽翼何以紓我懷作詩寄相憶

舟中夜飲憶和弟聯句

人生如浮雲聚散苦不定

原

向來詩酒歡雖唱誰與應

貢

蟋蟀鳴在戶玉衡逼冬孟悠悠千里思寂寂中夜靜

豈曰無他人不如我同姓

原

吁嗟繫名利有若置機穽

窘然塵埃中恥無六翮勁訪戴舟已慙攀嵇駕難命

貢

臨觴置不飲引領起獨詠莽莽天地昏誰知我心恟

原

蘇安上之淮南十八舍弟之河北十九舍弟之漢

中皆會予賦三韻為送

攜手常苦難傾蓋不易得今宵四面坐明日異鄉客秋

風楚懷悲出處各努力

鳳凰篇贈府公給事別

鳳凰起北海少留南嶽巔梧桐有餘音烏鵲相回旋耳
聞和聲樂目怪文采鮮雖知非儔匹慕用亦欣然祥飈
卷層雲迅羽凌九天卑飛忽如縈絕迹不可攀徘徊故
林下歎息高風前願及夔作韶率舞如舜年

承以鳳凰篇為況謹用來韻和酬

吳育和作附

丹山鬱世表巖巖千仞巔自非常雖輩安得參周旋

胡為此弱羽越遙祥儀鮮飛鳴過所據飈駭俄翻然
退則安棲地翔風娛楚天始病孰儔侶乃與朱鸞攀
英英日相照老翮徒愧前少別正傾聽覽輝當聖年
深甫往固陵

聞君異鄉客歲暮江淮間山雪夜多興桂枝春可攀
南風玩嵒窳浮俗矜游閒安所彈長鋏何當問刀環
天倫眉最白子舍衣仍斑勿學髡接輿佯狂因不還

飲郇公園贈章湖州何漢州

朝暉散浮陰天氣清且佳春城足行樂況此公侯家珍
館深窈窕茂林揚芬葩幽禽轉新聲宿草含芳芽覽物
曲池平置酒白日斜因歌雍門詩四座皆歎嗟平生布
衣願不過東陵瓜致求多贏餘竟是迷紛華一醉稱日
富此風獨可嘉安能拘浮俗局若井底蛙客有章與何
高冠耀文綢方為二千石會促別且賒他日還相思當
在天一涯歡極情難忘願君盡流霞

雪後到薦福寺梅下

行尋殘雪遠暖就梅陰坐悟彼寒氣消識此春景破留
僧迨日暮聽鳥忘巾墮從此到芬芳應須數來過

呈獻臣 并序

始四月予來上清宮見石榴花方盛開已而復
有青箱忘憂紅絲夜合蜀葵朱槿芙蓉蒲劍紫
薇紅蓼金錢之屬相繼不絕而適及秋矣過此
又將有雞冠拒霜黃菊為續豈神仙之居固自
嘉哉因歌以寄獻臣

茲心厭囂冗幸與上清鄰上清何崔嵬高靜違颯塵珍
林散玲瓏寶氣浮氤氲綠華未及衰絳藥忽復新閒館
賓列仙祕殿朝衆真濃香無停期豔彩驚幽人顧謝武
陵子四時長見春

寄吳江大博徐君章

吏退簿書斂日落風景涼偶無事物累真得逍遙鄉疎
花媚空園脩竹蔭廣坐濁酒不難醉磐石可徑卧何必
凌江漢乃能濯埃塵何必潛山林乃能寄隱淪人多笑

此言此言未易笑非君契心賞誰肯過蓬蒿

觀魚臺

城下春池深潛魚時復躍高臺可以望暇日從爾樂散
懷混飛沈適意宜丘壑始悟濠梁翁荒唐謝名爵

府公射堂飲酒輒陪尊丈侍郎兼揖諸孫拜獻拙
詩

煌煌南極星粲粲北維斗稟齡瑞明時運柄變萬有降
神非尋常希世曾一偶積善如公家于今見純佑安車

告歸日三府升平久萬石均祿秩魯公拜前後茫茫周
漢來此事復聞否黃金鑄大印綠絲綰長綬方為累世
榮況多後來秀戲禽試强弩勸客滿春酒賤子敢再拜
願公更眉壽

秋陰

浮雲初無心已南復更北蕭蕭清風急忽忽白日匿時
逝物稍變感集意鮮適玄蟬號庭樹蟋蟀吟四壁自古
共此悲豈伊越鄉客

久陰

南方信卑濕風雨無時節春風仍晚寒陽和恐中絕蛟
龍乘江湖雲霧欺日月驅除懷熏風悒悒生內熱

蟋蟀

七月鳴在野八月鳴在宇九月登我堂十月入床下滔
滔歲方晏促促聲亦苦悲秋不悲已終夜如獨語時俗
有新聲誰能一聽汝

送王十二還乾州

窮通蓋有命富貴不能早君侯希世珍三十未為老棲
遲升斗祿奔走周秦道及親因為榮捧檄豈辭小北風
正凝霜千里徑無草人生貴感激豈以外物擾當為昂
藏駒勿自使枯槁

坐嘯亭納涼

長嘯振林木半空鶯鶴聲清風蘋末來孤月海上生坐
久物色改如有神仙迎

王昭君

金史卷之八
婵娟巫峽女秀色傾陽臺昔為一片雲飛入漢宮來明
鏡徒自妍幽蘭誰為媒丹青固難恃遠嫁委塵埃十步
一反顧百步一徘徊出門如萬里淚下成霰摧左右相
娛樂絲竹聲正哀豈不强言笑鬱鬱不可開黃河入東
海還從天上回嗟爾獨抱恨一往擲蒿萊

重一首同聖俞鄰幾持國作用前韻

昭君信絕世窈窕祕瑤臺歲華坐將晚玉輦何當來一
以畫為賞有如鴟為媒含悲下紫殿即路指黃埃光豔

動左右君心再徘徊白水不可變孤芳從此摧盛時能
幾何千載獨餘哀至今青塚傍積怨昏不開披庭用色
選丹青以利回寄語閨中子何憾處蒿萊

憶松

松陰何婆娑松蓋何偃蹇松香不堪折松色無可選旦
暮青松間吟懷未嘗遠嚴霜百木死高秀初欲展泠泠
海風飄輝輝甘露泣

昔年予居閩
時甘露降

去矣混塵滓懷哉邈

林巖諒無刀斧憂千載行可踐輦轂念山海誰期共攀

金史卷之八
琴獨有風入聲琴中尚悠衍

留侯

張良韓孺子夙昔志未伸授書黃石公問禮倉海君契
合見神助濟時効經綸指揮轉雷電顧盼定楚秦以伋
三寸舌抗茲百萬軍一為帝王師晚就赤松賓富貴心
不屑功名諒誰論出處何昭昭賢哉古之人

錄近文呈晏公

麟趾感素文躍魚赴鳴琴殊類豈自識至和動其心濟

世有先覺鑄人不鑄金剛詩在正始好樂非好音萬生
依陶冶一氣諧飛沈賤子晚及門獨學謬知今趨隅誦
所志踴躍不自任救渴而飲河栖枝以巢林量微志復
小俛仰感高深

讀晏子春秋

并序

世譏晏嬰之節偪下夫晏嬰大不治宮室細不
治冠帶無衣帛之妾則信儉且陋矣至其脫左
騭以濟越石父之困出倉粟以成北郭騷之孝

又何其裕哉世之君子未嘗道其裕也而獨病其陋是以宮室則必修冠帶則必麗陳妾則必富所惡陋于己者從矣所能裕于賢者誰哉吾聞陋于己裕于賢之謂儉陋于賢裕于己之謂吝晏子固儉矣于聖人之道何貶焉

平生實善交厚薄等新故解驂濟越石調祿謂車御猶稱禮偪下未免儉則固高風往既息顏迹後方驚陳妾輕綺紉賢士敝襦袴若人不重得遺論今始布吾亦太

史徒執鞭所欣慕

公是集卷七

欽定四庫全書

公是集卷八

宋 劉敞 撰

五言古詩

以近文投謝學士

自昔周旦死珍鳳閔空巖民斯未嘗見猶取圖象觀況
彼聖人沒衆說紛無端能言拒楊墨豈祇均遺鸞念我
生苦後讀書樂瓢簞潛精探遺文倣象良云難猶如琢

圭玉攷法求所安雖無繩與矩我知不為九凝誠矢弗
變勢利非攸歡譬于寸木微積久能嶢岼有羽必懷聳
有聲必希彈方期沐清德敢不振斯冠

答吳沖卿學士

人生若浮雲聚散不自知昔與子相逢綠衣汝水湄兩
家賀羊酒道路生光輝變故一朝華各在天一涯我病
陳蔡間固窮莫自持君為周南居流涕極所思日月忽
已改舊游不可追豈悟羣玉峯攜手如素期感愴從中

來當歡反成悲求友聆嘉音喟然見新詩廢學老將落
積憂志益衰俛仰諸公間嘿嘿慙見嗤子我平生交夙
昔聆箴規相愛當見勗勿同衆人為

寄朱三學士

憶在京輦居相與巷南北幸非勢利合同有春秋癖往
來熟杖屨假借通經籍誰謂數斯疎要云諒且直別離
淹日月寤寐見顏色惠我以好音欣然對真迹微官事
如毛徇俗頭欲白庸知尚可教願子更良食

送李紱學士請示江韓諸君

我醉闕門外卧備東藩臣君從天上來秀色落青雲留
連三日語多得所未聞僻陋不自知喟予久離羣南風
吹白沙六月天晝昏送行不盡境引望空復勤相識何
必舊白頭或如新有信當寄書毋遺傾蓋人

今旦

今旦風淒冷始覺陰氣繁白日無光彩未敢啓前軒卜
居止容膝他時用為嘆及此殊覺勝閉塞有餘溫撥棄

當世慮縱觀上古言禹稷稱櫛風孔顏樂閉門窮通或
相背勞逸足自論優游蓋卒歲達者嘗有言

送李才元

車馬何赫奕觀者更歎息富貴歸故鄉任州二千石賜
金為親壽衣錦供子職里閭納華駟公堂列嚴戟地兼
百城會衆有萬戶籍指撫吏奔走宣布民悅懌丈夫雖
非通豈負稽古力懷章過故人笑別見顏色吾徒若匏
瓜長繫慙不食贈君當何言有信勉相憶

送焦生

蒼鷹懷風雲六月不忘習寒蛟待雷雨深水聊自蟄多
君起江湖力學如不及擇師視洙泗履奧窺所立翰飛
自茲遠變化誰能繫孤劒屢感激四方慎翔集公子誠
愛客相門許長揖結轡因北游揮手謝朋執藏書就史
氏觀國榮天邑藉甚諸公間青紫亦可拾寧復悲歸來
眷眷兒女泣

聖俞受詔行田是時聖俞葬其弟公異未畢而去

蟲潦敗耕耘西成絕人望鄉農籲天意守闕書屢上憂
民聖天子擇吏賢宰相王畿蓋根本歲賦在寬放曰君
往行田究彼荒稔狀一當薄其租用以息民謗朝廷慎
指使推擇無與讓非君精明安局以致忠諒憂公劇私
為即夕治行仗懷悲念其弟卜日不果葬乃知體純粹
世士難以尚德澤既敷宣風謠還歷訪歸來悟明主自
致誰云妄

張老子出田所

魯人有林類底春獨被裘沿畦拾遺穗帶索仍長謳知
命忘其老樂天固不憂既驚端木賜復感東家丘夫翁
何為者歲暮亦遠遊北風吹白髮蕭颯田隴頭此意如
昔賢世人知爾不

同聖民園棋釣魚

山林自微尚軒冕非所營每及逍遙趣欣然得吾生春
塘漾綠水珍樹啼黃鶯心遠忘外喧境幽識人情垂釣
如有求而無得失驚臨局非期勝聊為白黑爭得意物

可遺忘言賞逾精此理俗鮮悟固當屬淵明

秋園晚步

秋物足悲咤丘園良考槃
翱翔攄結慮徙倚縱遐觀
爽氣使心厲淒風令自單
酸念無逕託那使百憂寬
鳥下見人寂螢啼知露寒
夕煙起城際反照映林端
竚立不能返迷懷增屢歎

競渡

三閭雖已死郢人獨見思
五月江水深遶城碧邈迤輕

舟爛龍鱗利楫劇鳥飛簫鼓駭蛟鮪鷹隼亂旌旗爭先
愛中流觀者被水湄漠漠懷沙魂一去不可追千載萬
歲後兒女以為嬉已矣國無人終焉莫子知

讀離騷

空庭衆鷺息風葉獨紛紛秋期此時改感歎坐黃昏遠
懷靈均子著書為平分念爾剛直心吐茲清麗文上嘉
唐虞世下悼商周君能與日月爭不能卻浮雲浮雲蔽
日月歲暮柰憂勤精誠誰謂遠恍惚若相聞

秋過臨波亭寄陝府資政給事

不復池上遊秋意忽已繁
卧柳半死生枯荷自翩翻
憶昔載後車逍遙臨中園
觀魚有縱辨運斤契忘言
豈獨歲月晚正傷離別
魂人遐室空邇幽興誰與論

讀聖俞我今五十二詩感之

子真神仙吏不識傷別離
忽逢舊文歎始悟人間悲
歲月流水逝富貴浮雲馳
徘徊撫往事感激吐新詩
流水難以追浮雲難以推
百年半如此萬事從可知
且欲拂

金匱山房集
卷八
衣行聊及鱸魚期君若變名姓相逢復何時

上嶺下嶺

上嶺惟恐遲下嶺懼顛覆一嶺但數里思慮千盈腹不聞二大夫致身未嘗辱

送袁同年殿丞陟通判撫州因還洪井舊居袁在朝數上書言當世事某與袁別十年矣語舊多可悲者留三日乃去

輕舟何翩翩新冰浮清川問之亦奚樂歲宴道且遠云

我大梁客游說萬乘前畫策不見收故鄉復言旋薄祿
及吾親就官若歸田名實兩有適遠近誰間然憶昔都
門別爾來彌十年蒼蒼豫章質更覺摩青天語舊或涕
流舉觴愧留連相從且未果使我心勞悁

送裴殿丞

君已頭髮白猶著五綵衣出門我意失贈別雙涕揮自
古不澤祿念公早旋歸天歡固為樂外物焉足希達矣
老萊子千年見餘輝

裴殿丞訪別說春秋期歲初復來

吾衰不夢周知我在春秋斯道宜未墜夫公能見求相

看頭可白感別歲空道念子期雞黍懷汗漫遊

此殿丞君

好道士攝
生之術

送雍秀才歸瑯琊山

希聲未易合皇華衆方笑與子東西人相逢偶同調億
年寄神解萬里在心照此間豈容言吾得安蓮藿煌煌
千金珠舉世矜賞好安知緯蕭翁棄置久高蹈盛論山

水趣局促恨未到江湖且相望送子一長嘯

鳴禽

朝日升屋梁喧禽鳴樹巔東風不相期自與春意旋振
衣起前庭天色綠窅然非煙颿微和目極相繇繇行尋
林間步萸英已可攀萬物在陽舒胡為慘不歡幸有二
三子采芳玩華年不及古之人幽懷聊復蠲

驚禽

幽鳥何所託高棲衆林端風巢雛穀危露葉毛羽寒半

金匱要略卷之八
夜吐明月驚鳴遞囂謹迎光怪焚巢顧影疑飛九何為
貪擇木通夕不自安乘高非爾謀宜下易所觀不見丹
穴鳳深居全綵翰

八角井

誰鑿八角井不方亦不圓此地饒美水此井獨苦泉
甘常早竭泉苦更永年浪得世上名對之還慨然

雨過張先生

稟生本迂闊習性益疎嬾遇境賸欲留得人輒迷返先

生老鄉曲素髮頗樗散相遇年已忘心親禮逾簡幸無
富貴憂時可青白眼驚呵左右人邂逅以繾綣初隨朝
陽出忽報山雨晚天路良幽艱歸途失平坦

寄公默先生

昔賢避言色先覺如觀火作者有七人清風緬遺我浮
俗滋缺缺羈人畏瑣瑣知言豈易值卷迹恨莫果所願
學孔子無可無不可寡過知未能同聲賴銘左

恩賜御書呈同舍諸公

金史卷一百一十五
聖神紹先古述作備新書微生濫中祕重賜等諸儒日
月明天文龜龍粲河圖精神駭耳目黼藻賁泥塗發揮
篋中藏更得神宗初光華混新舊筆墨肖錙銖幸生堯
禹間而見典與謨上為四方賀善繼古所無下竊私室
榮搢紳誰與俱漢史探會稽周臣覽崑墟蕭條千萬里
筋力固已劬而我獨何人荷寵安厥居受學庶無負傳
家既多餘願從二三子講誦無時虛

與景仁聖俞飲景彞西園

鬢髮今日白山林未能往每逢負郭趣嘿有歸田想置
酒松柏間當春更蕭爽欣欣二三子相與留一賞早花
何娟娟秀色傾宿莽馴禽聲喧呼永不忘羅網物情樂
于適未必在深廣育育井中魚胡然困偃佚佳哉主人
翁示我以天壤放懷寓一醉益愧鳴佩響

園井中有
魚數十頭

送懷安李使君屯田

汝穎多奇士磊落布方冊先進存古風若人復令德詩
書秀英華鷹鵠勇排擊曩者從軍行早聞平戎策縱橫

志未展慷慨意更激坐驚齒牙脫忽使頭髮白頗與嵇
阮同閉關以藏迹老驥甘道路黃鵠羞斥澤復持一麾
去堅取萬里役旌旗暗長亭已想蜀山碧鼓吹喧前除
稍知楚風易專城自足貴遠覽固多適胡為結離愁恨
此晚同得

題賈大夫射雉圖

控弦誰家子馳射落名翬傾城絕代女巧笑揚脩眉覽
古按圖畫悵然增我唏壯士不擊賊顧從兒女嬉威弧

無用世反事禽荒為嘿嘿千歲後正為來者嗤

示張直溫

築山必使高鑿井必使深百工戒淺近盛德羞浮沈焉
有尺寸技能棲垂天禽焉有升斗泉能容橫江鱖借茲
喻物理足以開君心隘在容不足弱在力不任大道如
路然固無古與今

臨淵亭望鳳凰等山作

孟公多勝詣故在杯酒間雖非菊花時輒復尋龍山平

明騎馬出日暮倒轡還若人難重得此風猶可攀問我
亦何為脩然方閉關忘言在得意獨往路已難

聞隱直欲調官

蛟龍居池中仰活數掬水虎豹離山林求食輒搖尾張
君宜大用亦是龍虎比何得圖小官折腰五斗米屈伸
蓋時命隱顯乃君子譬由合抱材當自毫末起昔為青
雲高今落塵土裏可嘖復可驚誰能叩天耳

津亭

西風豁愁陰天水涵泳微波蕩寒日極目萬里淨離
披蒹葭老蕭瑟原野迴物容驚客懷櫓聲動歸興倦游
髮恐白多慮身復病緬慕蒼梧雲無心自輝映

和持國登開寶寺上方院寄孔寧極崔象之孫曼
叔

重山抱城起清川帶野回深巖古佛寺嵒嶂聳高臺此
地宜眺覽冠絕都城隈遠近見千里令人心目開憶在
七月中丞相自魏來百官迎道傍休騎茲徘徊衣冠相

勝凌塵土如灰我隨衆人趨出入再歷階不得及此
時披襟濯氛埃至今意耿耿負愧不可裁邇來讀君詩
足慰平生懷忽如升其巔四顧心悠哉往者不可及信
陵久已頽來者不可見孔侯與孫崔古今殊茫茫慨嘆
成歡哀會復從君遊于焉謝崔嵬

臨波亭飲席贈徐二

華星爛長天明月被清池良景豈易得佳賓共在茲形
骸久相忘卮酒安足辭高歌激風颿宜笑散春暉中置

浩長歎民生信多為非無逍遙鄉固在閒暇時及爾不快飲歲月忽欲馳世事紛悠悠放言為吾師

送張四隱直遊邊

吾昔讀漢書遠嘉馬文淵慷慨有大志不辭走窮邊嘗言功名期當及少壯年生圖萬里勲死棄馬革還此語頗豪蕩書之在青編其人雖已亡其意猶凜焉羌戎未伏誅王旅多喪偏安得如此人西行隴與汧借籌資方略還為天子言海上惟歎息今時豈無賢忽聞張公子

奮起殊欣然歷覽涇渭旁
究觀敵根源寧復謝古人
正堪豁憂煎衛青出行伍
去病幸有天相繼取封侯
有若翻手間男兒誰不如
可得甘棄捐讀書反三黜
何用師孔宣我豈少游徒
規規守鄉田力弱非志弱
送君心長懸

同貢甫詠丁晉公園池

一死復一生一虛復一盈
猶悲門易軌況乃谷為陵
曲池久蕪沒高屋尚崢嶸
自古若傳舍毋為方歎驚

送韓七寺丞知蕭山

原註韓穎川人兄弟
八人皆仕宦顯名

君家潁川上時論數八龍聲華自照映遠與高陽同季
慈又青出秀氣凌秋空安步可遠到何為菰蘆中會稽
自禹來山水天下雄古人每獨往勝事殊未窮聊欲因
弦歌登臨極江東超然語高邁令人媿樊籠我昔更此
邑稚年尚兒童邇來成夢寐自笑成禿翁安得方寸金
換君腰下銅越吟不自然極目南飛鴻

初夜

汲汲晝彌短悠悠夜增長貧家不具燭坐須明月光隱
几四寂默陰蟲鳴我傍天時有推敎物性隨悲傷感彼
忽自驚喟然發心狂壯年何所成憂患攢中腸咄嗟牛
衣叟婦女知激昂國恥吾亦羞如何埽封疆譬如籠中
禽左右不得翔知音古亦稀誰謂歌中商

靜夜

花影不可埽縱橫月明中光芒衰新露香氣生微風夜
永興不淺幽人與誰同

迎恩甫

相別才一月相憶如一年豈無白首游不及夫子賢
邂逅發寤寐奮飛絕由緣忽聞乘春浪千里下歸船
雞黍可以具班荆荆暢幽悵

公是集卷八

欽定四庫全書

公是集卷九

宋 劉敞 撰

五言古詩

雨中獨居有懷江梅

晨起風雨交蕭蕭秋意寒出門無所詣行道如此難思
我平生游相得他日歡興來未嘗約趣合不待言濁酒
有與醉孤琴能一彈時時商聲歌磊落千琅玕浮雲歸

無期宿草秋向殘獨咏雞鳴詩一唱三四歎

過聖俞讀其近文明日寄之

昨日過君家雙瞳偶清刮非無塵俗累喜見秋陰豁
注
瑟請新聲瑶音邈起越神驚自束躅不為天寒發

憶梅

豈無棟梁材為君構明堂豈無調羹資為君致烹飪獨
使限荒鄙委之道路旁歲晏吐奇秀芬芬有餘香疾風
見松柏衆穢知蕙芳譬彼君子質幽沈道逾彰安得假

神術徒根儷長楊遼哉計不果我心不能忘

傷胡二

人生期百齡子適四之一人仕期萬石子適升斗秩稟
靈甚純粹守道復貞吉無負於神明如何有倉猝雖登
爵一命亦治邑千室名竟未達君澤亦不被物鬼神莽
無狀天道渺難詰冥冥九原深永與顏賈匹

觀永叔五代史

大均運元和萬物分一氣相雜以成文自然故為貴道

哀三王末議出百家沸仲尼日月也薄日為之既春秋
日筆削天地復經緯大法初粲然亂臣以為畏微言迨
秦漢變雅從晉魏逐末競錐刀澆淳玩花卉安知作述
本庸識文章意中間馬與班二子稱髣髴猶云崇貨力
尚或排剛毅才難乃其然可以長歔歔退之不為史于
道其猶未胡為體明哲曾是回怨誹國典竟蕪雜唐風
亦隱厓陵夷九易姓禍亂森如蝟儒術駭中絕斯民遲
攸墜紛紜混朱紫清濁誰涇渭龍飛真人出虎變斯文

蔚天意晚有屬先生拔乎彙是非原正始簡古斥辭費
哀善傷獲麟疾邪記有蜚處心必至公撥亂豈多譁何
必藏名山端如避羅爵曰余仰爐治有意自勅荆璉門
投耒耜假蔭親蔽芾所望窺冊府無寧辱賙餽狂者實
進取日中固必焚飲河雖非量滿腹尚自慰演孔幸受
經居齋竊忘味

寄張拱辰

楚人少眉壽此翁七十餘荆士多輕揚此翁乃好書世

驚悅膚淺此翁識古初習俗爭錐刀此翁尚玄虛數欲
見此翁為其亦起予責人必求備堯舜猶病諸漁者公
閑休逸人狂接輿有之幸見告我且從彼居

休與比
楚人

竹牀

櫛櫛裁脩竹熒熒粲寒光浮筠凝烟霧疎節留雪霜甘
寢百疾解側身夏日長此時四海波亦已如探湯嗟我
智慮短苟為安一牀

哀三良詩

并序

秦風有哀三良詩刺穆公以人從先後王祭作
哀三良者興曹公以已事殺賢良也陳思王亦
作之者怨已不及死者也吾以哀三良仍有餘
意猶可賦詩故復作焉當有能知者

士為知己死女為悅已容吐嗟彼三良殺身徇穆公丹
青懷信誓風昔哀樂同人命要有訖奈何愛厥躬國人
悲且歌黃鳥存古風死後不食言生寧廢其忠存為百
夫防逝為萬鬼雄豈與小丈夫事君謬始終

馬生自汝南來求入太學不得請詩以歸

士貧謀國拙安得辭泥塗馬生負長劍嘆曰歸來乎尺
薪等芳桂斗粟兼明珠王門不見容憔悴如枯魚我無
升斗水慰子朝夕須亦有西江濤疏遠不可圖相勸早
旋歸詩書自為娛男兒患無術餘事從卷舒時至當奮
飛翮如巢中雛微物尚變化況君七尺軀

詠史

主父希世者畫策妙縱橫指麾一言用震動諸侯驚日

暮臨遠塗中道方倒行不忍藜藿食意從五鼎烹寧知
鹿門翁白首長躬耕天下非所保功名安足營

入荊江

此江自岷山浩灕浮西極中為三峽束壅闕氣憤激崩
騰得平地千里怒未息雖投洞庭濶爭道猶逼窄觸岸
皆倒流勢兼萬牛力渾黃不可鑑咫尺膏玄白頗似崑
崙流洩源下積石逶迤屢屈折九曲乃大直始信枉渚
歌至今猶悽惻中流忽沙沸慘慘半江黑俄頃成丘陵

方舟渡安得坤儀理事靜何故輒損益多異真窮鄉所
逢豈中國墨生忍黔突孔子不暖席賢聖亦遠遊吾寧
倦行役

和隣幾持國景德寺納涼

四時急相乘五月大火中天地為熾爐萬物皆沸銅吁
嗟望雲漢長嘯懷清風覆載雖高厚跼蹐似不容蚩蚩
道旁子奔走勞歛躬外以塵土傷內為利害攻狂醒無
由濯勢與羣物終安知道遙遊采真得所從寶宇豁高

嚴劇談叩真空虛白從中來清涼脫樊籠惜哉但獨樂
不與斯人同作詩奇妙賞藐若凌青穹依隱或玩世說
時在不逢三復金玉音曠然已發矇

送劉初平謁會稽范吏部

劉生大梁客五十恥獨醒觀書汎為通不肯明一經壯
歲懷慷慨邊游忍伶仃擔簦售白璧垂蒯提青萍歸來
面朝士口寫山川形公侯盡高意禮數爭分庭落魄破
小節浮游謝塵冥誼諧若流輟捷勝如建瓴苴苒混朝

市繽紛邁年齡有云致官爵百說無一聽二子才劍映

衆豪固螟蛉以茲滯玉帛亦不羞巖垆太尉辟開府

夏

也

中丞請居廷

孔道補也

拂衣東南走高揖千巖青禹穴發

窮寶雷門叩驚霆邦侯萬人傑憂國心無寧得善輒解

榻發奇肖開矧抽辭肯聽瑩宴舊方淹停箬下進醇酎

鑑中結飛鈴高哉鴻鵠心去矣窮滄溟

謝主簿示雜文

少不學為吏俛仰亦非良終日簿書間忽疑鬢髮蒼無

聞畏後生素習成兼忘吾子豈獨迷相從道文章上論
聖賢心下救世俗荒磊落古人風粲然在我旁精享脞
日月爰居感鏗鏘置此但為好切磋非所望

開元寺

寺在汝寧府本顏
魯公真卿舊居

自古皆有死豈惟直如弦魯公既中天狂寇不獨延茲
寺數經亂叢林廢為煙若人昔所居故老廣其傳直氣
觸白日沈憂凌青天悠悠穹壤間肯與蛛蟻捐事往理
冥漠悲來涕潺湲作詩識其處尚想音容全

金史卷之三
卷九
漢武帝二首

武帝固英雄總擘皆軼材南并桂林地北守單于臺軍
費累萬金馬迹窮九垓時獨卜大夫規規輸其財忠義
豈不然告緡自此開茫茫文景後田野卒汙萊孰謂將
相謀竟貽黔首哀晚悟富民侯後時信悠哉

洪波漏金隄河伯獨不仁不有封禪行安知愁吾民
翩海濱子自以通鬼神黃金成虛言鴻飛邈無因武安
玩天時獨秉萬國鈞愴似宣房詩卽吏終負薪寂寞千

載間真偽共沈淪何乃忘謗書世固無直言

楚風四首

三楚多秀士從古謂之然接輿既斃首三閭復沈淵大
屈備時玩白珩為世傳批糠鳳鳥歌瓦礫離騷篇已矣
德既隱孔車為回旋

巖巖章華宮灼灼高唐觀弔隨俯仰離合異昏旦人
生詎能幾物化每交亂千秋萬歲後寂寞江與漢

宜僚樂市肆叔敖榮寢丘不惡漁釣卑吾聞公閱休顛

冥天地間世與我悠悠豈悟多種橘可齊千戶侯
唐侯兩駟駟夙昔困多難蔡國雙狐白豈知反為患世
哀道為通服美自取間敝縵可終身鴻飛諒何篡

雜詠

今年四十一髮白牙齒脫未能遊逍遙意每不自豁偶
尋樂天詩往在江州日年幾與我同哀疾與我埒伊人
了無生外物均寂滅而且于形骸變化難自適況我狹
中者萬緣日相伐力小覺任重憂多使內熱安能保平

和但有就夜竭賢哉香山翁精誠妙前哲懸車未六十
鼓缶終大耋以茲揆損益亦似有與奪至理何心得吾
其守茲說

二十六日大風寄貢甫

雨止天大風草木皆怒號居人不得寐起見星月高鳥
獸羣悲鳴空虛如波濤行子今安至愴愴我心勞山川
幸非遠歲月亦未滔自傷下澤車不及鄉里豪袞袞隨
飛蓬悲歌擊長刀丈夫寒如此何愧兒女曹無由託飛

雲更寄身上袍

墨河館連日大風

空桐倚不周近戴北斗魁上天限中外自古常風霾我行迫隆冬周覽窮荒回魑魅醜正直共工負其材初如百萬兵鳴鼓天上來日月慘不光星辰為之顛又如海水翻洪洞奔天臺四顧無復人但聽萬壑雷搖山墮危石略野荒纖茲鳥雀失食悲虎豹忘羣夜大叫不自聞卻行尚欲摧而我伏漢節何由脫氛埃先王外荒服赤

子棄草萊陰斲竊號今天網殊恢恢我車傷崔嵬我馬
勞虺隤感彼雞鳴詩聊以慰永懷

奉和永叔夜聞風聲有感用其韻

往為名山客浩蕩多奇觀六月湖海卧飄飄生羽翰悞
升紫垣籍草野非所安金火三伏交束帶愁衣冠飛塵
變形骸內熱焦肺肝豈惟天有時人事亦可歎適有涼
風來蕭騷庭葉乾感之意飛動忽若駭龍鸞銀漢水可
涉枯槎去無難洞庭魚正肥遊子行足歡飲酒讀離騷

金元已卷之三
一
晬天壤寬要當以樂死日月誰控搏夫子文章伯已
在青雲端且方濟一世詎肯哀盤桓作詩破冥煩磊落
冰雪顏懔懔屈宋詞千秋劇椒蘭

春旱天多風贈深甫

春旱天多風十步不見人自非勢利役誰肯輕出門我
亦閉戶居寂寞臥晏溫歎息中庭花散隨扶搖翻百芳
半摧折白日或翳昏安得起塵埃高乘雲雷奔壯心更
激烈中熱生肺肝愧君憂陋巷眷眷迂輕軒高論清我

懷忽然失冥煩

呂梁

呂梁信天險魚鼈不可游
引棹出叢石一經用百牛
洶含風電蛇涎噴蛟虬
世自有畏塗吾仍恥隨流
側見百仞奔俯窺千丈幽
自非跂達觀未易寬百憂
夙昔涉老莊縱心會虛舟
忠信猶足恃放言禮門由

蜀岡南麓

山深行易迷南麓偶清曠
雞犬鳴谷中樵童戲巖上
茅

淡肖浮居牖戶相背向竹徑通往來清陰亦彌望白頭
三四老相見語歡暢心疑避世子形迹一何放行將從
之遊自恨苦羈鞅不能問姓名聊作招隱唱

種竹偶書

少有王子癖長憐此君雅常嫌地宣窄不敢謀蕭洒昨
日山客來勸我栽砌下感荷知我心遂得移遶舍其中
置磐石可以措尊竿于此更一座以待違名者山禽時
復來清轉如郊野其餘卽無見不辨春與夏吾惟厭時

俗人亦來者寡順然兩無識外譽焉足假新筍漸盈尺
新枝已鋪瓦燕雀勿相驚深沈似隆夏

勸思弟子南軒種竹

世皆笑幽獨何不少自貶種竹南軒間亦足以相檢況
茲歲華晚衆卉日凋斂清節良自如栽培匪為諂豈知
牕戶側秀色窺荏苒會茲東南美相對情不憚楚人昔
頌橘行比伯夷忝此君最孤高堅直難外掩凜氣有精
粹筠光射圭琰他時雪中客往往疑清冽

古俠客行

壯年志慷慨結交慕英雄大梁多長者燕趙有古風千金起為壽一諾不顧躬自謂松與栢忽為萍與蓬市道今乃知利窮非義窮

深甫過留宿并示近詩

別長會時稀樂少憂日多邂逅非素期悲歡奈君何明燈照空牕風雪滿天地此時坐相對達旦終不寐少年慕結交徒以此方寸危生始有感來日安可問意氣久

已奪形髮亦已衰如何切磋意不廢平生時驚禽墜虛
弦病葉墮輕露一聞傷心奏涕下已如注

留張十二宿

少年有佳趣老夫意獨驪常恨離別久忽忘會聚難殷
勤置杯杓蕭散遺衣冠誠知惜短夜為我強盤桓

和鄰幾八月十五日夜對月

外事已波濤回首已陳迹獨有雲間月相見不改色慰
我平生懷故在中秋夕我髮見二毛羈旅多所歷每逢

桂花秋興發勸更劇江湖與山林所至得真適今年都城游日與賤事逼得閒輒昏醉向晦專寢默覺醒忽天明不見千里白誰令心賞遠坐使歲華隔徘徊不自愜悵望空歎息見君新詩章暫若對寒魄清光動人目諷詠當自釋

腳冷

踐霜腳如脫知我血氣衰
況復齒牙落鬢邊亦有絲
人生會當老何計遲速為
但願多美酒憂來忽如遺

和江十飲范景仁家晚宿秘閣賭伯鎮題壁記番

直日月感之作五古

阮公有大度于世無所營顧獨好飲酒而欣為步兵未
嘗語是非舉俗駭且驚夫豈知胸中礫硯獨不平西登
廣武原咄嗟豎子明竭來蓮池上詠懷激哀聲此風久
不聞寥落成千齡鄰幾頗其流貧賤能忘形校書天祿
閣不忍游公卿時從好事飲傲兀人間情髮白不自疑
歸來臥前楹顧見壁上書始知歲月傾喟然感舊交因

欲東南行黃鵠真去矣白雲遠冥冥吾聞至人語大塊
勞我生天地一毫間出處何重輕但使樽有酒長醉不
用醒君當解此意獨往何必清

賀王介甫初就職祕閣

鳳凰信高遠矰繳安得羈非君九韶奏詎肯一來儀王
子美無度孤飛絕雲霓常恐濁一世斯人莫見之天子
蹈軒虞公卿聚臯夔孰言阿閣下定有朝陽詩願得調
律呂聆音辨雄雌毋空著圖象但取夸童兒

修府學後同官僚見諸生

用儒沐休運撫俗奉明詔雖愧文翁治猶非武城笑茲
堂丞相規頗盡泮宮妙高閣橫青冥長廊驚竚窳春秋
大復古修舊非所誚庭壇一已新丹堊歟相照迂踈賴
衆才簡默希坐嘯況多都邑賢厯講道術要藩籬可目
涉弦誦或耳剽汜鄉亦何人千載名獨劬

煌煌京洛行

紫極開天門慶雲麗皇居卜郊定九鼎懸闕觀寶書德

澤浸無疆風俗返華胥冠蓋百萬家車馬十二衢輕肥
耀朝日富庶極中區游俠信陵後節義大梁餘顧盼生
光輝吹拂動萎枯貴賤且貿遷高陵忽為墟變化若有
神升沉豈嘗拘咄嗟鄒魯士何用空躊躇

代書寄鴨腳子于都下親友

予指老無力不能苦多書書苟過百字便覺筋攣拘京
都多豪英往往在石渠作書不可周寄聲亦已疎後園
植佳果遠贈當鯉魚中雖無尺素加餐意何如

寄貢甫時隨侍入蜀

囊別百里近愁心亂清秋令別百里遙秋色繁遠愁我
飛乏羽翰我居悵淹留忽如轅下馬局足難自謀古人
有先覺不願往諸侯我乃今知之曰歸邈無由朝吟南
陵篇暮弦梁山謳離魂如明月昔昔西南流

戴村

羈旅淹歲改江臯屬春早幽村屢獨往勝事時默討深
竹尚殘雪陽崖已芳草茅茨忽連接鄰里自相保人猶

安道族景是山陰道徘徊問蒼舊或遇棲真老

種瓜瓠

吾生拙用大江海思遠適豈獨為瓠瓜長繫取不食漆
園有遺意放蕩豁心臆樹此無何鄉近身見多益五日
拙一旬十日成百尺纍蔓更相引甘實行可摘因之浮
汗漫去矣笑跼蹐從我其誰與由也不可得

簡深甫

與君一城居其實跬步間慊慊不相從十日俄忽然一

城豈為遠十日豈為短客子局人事心與迹相反而況
各異鄉茫茫隔山陂歲時若奔車過去誰復推伊昔厭
幽獨願子東西隣雖隣尚不覲何似南北人人間實如
此千別能一會興來即上馬埽榻聊相對

贈陳襄秘丞自峽中召歸

淮海南國衝冠蓋結浮雲面交固不數白首猶若新之
子天際來各自東西人一語旦連夕歡如平生親豈伊
名聞久固以意氣均馳驚詩書間博哉醇乎醇我昔病

俗學莫明聖與仁常恐遂至地豈期晚有隣君還覲清
光一二席上珍賢者任必重勉旃覺斯民

陳迴此與其
談性命仁聖

之間留五

日乃別

送冲卿守高郵

雞鷺守樊籠鵠鵠游四溟羨君一麾去不負人間名孤
帆西北風海日東南明回首笑富貴浮雲亦何輕我憶
童子時錄衣戲五亭離懷重自感墮淚沾長纓

公是集卷九